

208
17

IN FVNERE
CAESARIS
RASPONI


S. R. E. CARDINALIS.

ORATIO

STEPHANI GRADII RAGVSINI

BIBLIOTHECAE VATICANAE


PRAEFECTI.



R O M A E,

Ex Typographia Francisci Tizzoni. MDCLXXVI.

SVPERIORVM PERMISSV.





EMIN.^{MO}. ET REV.^{MO} D.D.

FRANCISCO

S.R.E. CARD. NERLIO.

STEPHANVS GRADIVS

Bibliotheca Vaticana Praefectus. Felicitatem.



LARORVM Virorum facta, moresque posteris tradere, idque expleta recens eorum mortalitate ex loco superiore apud apertas tunc maximè ad talia populi aures cum prædicatione, & laudibus exequi, vetus huius Ciuitatis, & propè cum ipsius Urbis mœnibus natus mos est: utque laudatoris huiusmodi partes assumeret, prout quisque defunctum hominem aut cognitionis, aut amicitiae necessitudine attigisset. Sic à Iulio Cæsare Iuliam amitam, uxoremque Corneliam, sic à M. Cicerone Seruium Sulpitium, sic à Consule Cornelio Tacito Rufum Verginium laudatos accepimus: sic etiam necesse est sine discrimine loci, atque ordinis præstantibus dignitate viris tenuioris

nuioris fortunæ contigisse laudatores ; quorum non
 ita facile est catalogum texere , quod scriptoribus in
 prodenda rerum , hominumque memoria sublimia
 quæque duntaxat , & (vt Liuius ait) in illustri posita
 monumento spectare placet : Hunc ego morem , ne-
 quaquam , vt pleraque alia laudata , obsoletum pe-
 nitùs , aut intermissum erga maximum virum Cæ-
 sarem Rasponum Cardinalem , rebus humanis nup-
 per ereptum , seruare magna ex parte conatus sum ,
 contexta , & scripto consignata satis prolixa dispu-
 tatione ad modum orationis funebris , quasi in Am-
 plissimo Ordine Vestro , vt moris interdum est , pro-
 nunciatae , quæque hac ipsa de causa pronunciata non
 est in solemnibus exequijs , quas illi in Aede sacrarum
 Virginû , quæ à Sanctissima Incarnatione nominatur ,
 amici , clientisque priuatim celebrauimus . Quam scri-
 ptionem , quia video cœteris plerisque viris doctis non
 improbari : Tibi verò , Princeps Eminentissime , etiam
 placere , & laude dignam videri , securus aliorum de
 ea censuræ , & quia egregij viri fama , præclara vti-
 que , & magna , qualicumque præcone , futura , an-
 tiquior mihi omnibus meis rationibus est , publicare
 in animo habeo , & vt in manus eruditorum , qui vs-
 quam terrarum sunt , quàm fieri potest , ornatissima
 perueniat , operam dare ; excellentiam virtute , ac
 dignitate virorum ope subnixus , & præcipuè Tua ,
 Princeps Eminentissime ; Cuius idcirco nomen , ac ti-
 tulos in fronte circumferens grata cùm alibi gen-
 tium , tùm maximè in Vrbe , & cœtera Italia species
 eius , & accepta , & fauorabilis accadat . Pluribus
 autem , grauibusque de causis ad Te potissimum re-
 spexi ,

spexi, & primum omnium, quia Te Patronum in locum amissi clarissimi huius Patroni, eique & sanguinis propinquitate, & gestorum in Ecclesia munus communione, & simili morum, vitæque integritate iunctissimum, adsciscendum mihi constitui, eaque gratia literario aliquo munusculo propitiandum; vnde extaret publicum, ac perpetuum obsequij erga Te mei monumentum. Quantulum autem distat hoc, quod affecto clientelæ erga te ius atque honos à iure, & honore hospitij, quo dignatus iam à Te sum? quoque nuper splendescere mihi licuit in Archiepiscopalibus apud Florentiam ædibus tuis, intra quas occasione meæ ad Venetos professionis per lectissimum adolescentem Iosephum Marchionem fratrem Tuum splendide, & magnificè semel, atque iterum exceptus à Te sum, nullo prætermisso in me honestando officio, quod ad declarandum vtriusque vestrum erga me studium, & benevolentiam pertineret. His accedunt quotidiana humanissimi animi Tui argumenta, & honorifica de mea mediocritate iudicia, quæ, si minus ipse me nossem, minusque sæpè respicerem ad illud Horatianum

Ne cui de te plus, quam tibi credas,

~~commouendo animum meum, & usque ad arrogantiam~~
culpam extollendo idonea sint.

Admonet me præterea, vt Te præcipuè tam hoc, quàm omni alio cultus, & obseruantia genere mihi demerendum susciperem, splendidum istud munus, in quo scribendis epistolis, & dandis mandatis, & consilijs ordinandis, rebusque omnibus administrandis,

quæ

quæ ad statum commissi Sanctissimo Pontifici vtriusque inter homines imperij attinent, summa cum fidei, industriæ, & solidi consilij gloria versaris. In Te siquidem, & gloriosos Tuos labores intuentem subit iucundissima acti me puero temporis recordatio, quo Petrus Beneffa meus Auunculus hanc eandem Reipublicæ partem sub optimo Pontifice Urbano Octauo non sine aliqua laude gerebat, subit inquam

Et patrie mentem stringit pietatis imago,

renouatoque vetere optimi viri desiderio, in illa Andromachæ Virgilianæ verba identidem effundi iuuat,

Sic oculos, sic ille manus, sic ora ferebat.


eoque parua magnis componere, atque habitus animorum corporis lineamenti exprimere, & adumbrare gaudeo; idque vſitato communis humanitatis vitio, vt sibi quisque, rebusque suis plus nimio tribuat, seque, & suos magnis nominibus libenter inferat. Quidni autem magnum Te audacter appellem, Eminentissime Princeps? virum genere clarissimum, animis, & virtute clariorem: cui nihil eorum, quæ intra ciuilis dignationis modum indulgere homini potest, non indulsit fortuna: qui eximium purpuræ Tuæ decus es, ad quam per omnes propè aliorum Magistratum gradus, post edita illustria pietatis, prudentiæ, & inusitatæ liberalitatis exempla, & obitas inclytas ad omnes penè Reges Europæ legationes plenus honorum, plenus gloriæ, in ipso iuuentæ robore perueni-

uenisti, in eaque, auctoritate, gratia, & maximarum
rerum tractatione cum primis effulges. Sed conti-
nendus est non necessarius ad illustrandam rem om-
nium clarissimam verborum impetus, & habenda
ratio modestiæ Tuæ, Princeps Eminentissime, cuius id-
circo aures eò magis ab audiendis sunt abhorrentes
laudibus, quò animus ad laude digna facienda para-
tior est.

Imprimatur ,

Si videbitur Reuerendiss. P. Magist. Sac. Pal. Apost.

I. de Ang. Archiep. Vrb. Vicesg.



Imprimatur .

Fr. Raymundus Capisuccus Sac. Palatij
Apost. Mag. Ord. Præd.



ORATIO.



AESAREM RASPONVM Collegam vestrum, Principes Eminentissimi, acerbo Ecclesiæ, & omnibus bonis funere nuper elatum, laudandum ne hodierno die mihi, an lugendum, & lamentandum existimem, diu, multumque apud animum meum deliberaui.

Quis enim desiderio sit pudor, aut modus charissimi omnium mihi capitis, quicum annos ipsos quinque, & quadraginta, grande mortalis æui spatium, ab usque condiscipulatu coniunctissimè vixi, adedò intensis flagrantissimæ inter nos vinculis charitatis; ut, si in tanta conditionis vtriusque nostrum distantia ita loqui fas est (absit verbo invidia) in vnam coaluisse animam videremur: cuius maximarum, clarissimarumque virtutum cultui, & admirationi ita assuevissem, assiduâque earum tractatione, atque experientiâ ita sim delectatus; ut sine illo non modò acerbam mihi vitam, sed ne integram quidem, aut satis superstitem putem. præsertim quòd, quia natu minor aliquanto me fuit, & vita dignior; clausos ab illo videri oculos meos æquius, & ordini naturæ convenientius fuit. Quæ sicis oculis recordari sustineam illam summi viri humanitatem, illum ingenij, vitæque candorem, illam indolem, illos mores, illud effusum per omnes partes benemerendi studium, & voluntatem; ut affici se magno beneficio, quoties ipse alijs bene faceret, arbitraretur. Et adhuc de priuatis mei doloris causis loquor. Quid si publicas proferam, ob acceptum grauissimum ab Ecclesia, & Republica vulnus, quæ in tanti viri

B

amissio-

amissione ciuem optimum, iudicem integerrimum, senatorem prudentissimum amisisset? Nam quid ego de Vrbe ipsa dicam? cuius dignitati, atque ornamentis immane quantū detractum est hoc absolutissimæ virtutis exemplo detracto; quippe quod illa inter eorum præcipua recensebat, à quorum excellenti virtute hoc habet; vt se hodiernæ suæ maiestatis, & amplitudinis ne poeniteat, neue opus habeat ad excitandam in externis gentibus erga se admirationem, & reuerentiam redire ad fastos, & veterum suorum procerum præclara nomina vsurpare. Næ ego idcirco operæ pretium abundè fecero, si datum omne mihi ad dicendum tempus lamentando, quiritandoque consumpsero.

Rursus conceptum hunc tanti, ac tam iusti doloris impetum reprimat, & retardat incredibilis, ac propè diuina Viri constantia, & animi magnitudo, cuius ille luce cum per omnem ætatem eximiè fulsisset; in exitu vitæ, vbi talibus maximè opus est, ad miraculum vsque refulsit. Vt enim missam faciam admirabilem, verèque forti, & sapiente viro dignam, in perferendis diuturnis extremi morbi doloribus patientiam, quo ille robore animi, postquàm prævalentem vim eius intellexit, ad agitanda nouissima vitæ consilia se conuertit! quàm intrepidè, quàm securè certum iam, & exploratum vltimæ necessitatis nuncium audiuit! Nec enim magis sollicito animo ad illud sese difficillimum omnium ex hac vita iter ingredendum accinxit, quàm si ad vernam ex vrbe migrationem, rusticandi causa susceptam, acciogeretur. quos illi animos castè, & innocenter omnis acta vita, & vsurpata per omnem ætatem, mortis meditatio, & certissima Diuinæ misericordiæ erga se persuasio faciebat. Itaque post procuratam traditis ex disciplina Ecclesiæ sacris, & ritibus animam (quod ille continuò magna cum eximiæ pietatis significatione transegit) nihil iam mortale, nihil caducum, nihil huius vitæ delinimentis additum ad animum lætum, & bonæ spei plenum, atque in Deo defixum, & reclinatum admisit. Omneque adeò tempus, quod ad effusum vsque spiritum opinione diuturnius interpositum est, pro obiecta sibi importuna fruendæ celestis gloriæ mora inuitus

inuicem propemodum, impatensque traduxit. Nec verò aliter animatus, ac vsu interdum venire solet viatoribus, cum adornato ad iter nauigio, collectis sarcinis, comparato viatico domo digressi, ob improuisum aduersi venti statum in portu subsistere, & inter valere iam iussos amicos nauseabundi, sibi-que displicentes versari coguntur.

Hæc mihi, multa-que huiusmodi reputanti subit vereri vehementer ne non satis honestæ sint in hoc tam felici maximi viri sine lacrimæ nostræ: quibus tamen satis, superque sine teste, ac priuatim indulsumus: ne notam aliquam amiciria nostra contrahere videatur, si ab eo, cuius consilijs, sententijsque per omnem vitam consilia nostra omnia, sententiæque congruerint; in re vna omnium grauissima, & prorsus vnice nostris omnibus curis, cogitationibusque spectanda dissentiremus: ne minus æquo animo partem ab eo benè moriendo votorum summam accipere videamur, inuidique potius eius felicitati, quàm desiderij impatientes iudicemur.

Faceat itaque omnis animo moeror, omnisque luctus, & in alteram propositæ initio mihi deliberationis partem se effundat oratio, in prædicationes, inquam, & laudes, quantum ingenij nostri patietur infirmitas, exequendas. Nec verò dubitandi locus est, ne suscepto tanti argumenti onere rudis & indiferti oratoris succumbat ingenium; cui enim verba deesse possunt de eo dicenti, in quo celebrando, & laudibus in cælum ferendo vulgus ipsum, quod indoctum, & rude à sapientibus audire solet, disertum est? Quid enim per hosce dies in templis, in foro, in circulis, tota denique Vrbe celebrius fuit, quam voces omnis ætatis, omnisque ordinis hominum in eius laudationem certatim effusæ, eumque honestantes magnificis titulis viri boni, sapientissimi hominis, constantis amici, egregij Reip. ciuis, amantissimi Ecclesiæ filij, ingenio, doctrina, consilio, pietate præstantis, alijsque innumeris, quorum ego si partem modò, nec eam satis magnam in hanc meam disputationem coniecero, non vereor ne præstantissimo viro laudatorem idoneum defuisse dicatis. Verum alia via longè commodiore, & expeditiore hoc ipsum conari in animo est, vt scilicet

vitam eius, & res gēstas plana, & simplici narratione in medium proferam; laudatoris autem partes tacitę vestrę existimationi, cogitationibusque relinquam. Quod ego dum facio, dumque illum ab incunabulis per omnes ætatis gradus deductum, quam breuissimè potero, auribus vestris, animisque admoueo, oro Patres Eminentissimi vt me, quemadmodum, hactenus audistis, attentè, & humaniter audiat.

Natus est Cæsar Rasponus apud Rauennam, Urbem Italię cum primis vetustam, & nobilem, quę proximum ab Urbe Roma dignitatis, & honoris locum, delecto in ea Romanis à Principibus imperij domicilio, diutissimè tenuisset; splendida autem, & inter principes ciuitatis familia, quę viris fortibus, bellique; & pacis artiū gloria inclytis sexcentos amplius annos pollens, potensque, & clara per vniuersam Aemiliam, vicinamque Venetiam fuit. Patrem habuit Franciscum Rasponum, virum generis sui claritate dignissimum, de cuius laude, quia, citā morte subductus cum filio non vixit dicere, præmitto. Matrem verò Claricem Vainam, quę super generis antiquissimi nobilitatem, & præclaram ad omnem virtutem indolem, haustam in gyneceo regnatricis Medicarum domus sanctissimam disciplinam mariti penatibus inuexit. Hunc illa felici quinque liberorum prole à sese auctum intra quinquennium cum amisisset; conditiones secundarum nuptiarum, quę foeminę expertę fecunditatis, integra iuuenta, & secundissima virtutis fama omni voto maiores offerebantur, magno animo est aspernata; quod statutum, fixumque sibi esse diceret, illis vnici coniugij sui fructibus colendis, & ad maturitatem perducendis laboriosas suę solitudinis molestias perferre, & consolari: illud humierorum suorum onus, illam curarum materiem, illa dignitatis ornamenta futura, mundumque suum vniuersum muliebrem; quomodo Cornelia mater Gracchorum iactantibus sua monilia, suasque gemmas alijs foeminis claro ad posteritatis memoriam exemplo dixisse traditur. In huius gremio educatus à pueritia Cæsar nequaquam mollem illam, & eneruem, qua matrum vulgus vti solet erga filios, indulgentiam expertus est, sed potius patri

trui seueritatem . qua tamen ne magnopere opus esset, præ-
 clara faciebat pueri natura, & ad omnem capeßendam virtu-
 tem mirificè factum ingenium . Inter has autem virtutes
 princeps meritò fuit necessarius ille ad initium sapientiæ Dei
 timor, & animus erga hanc ipsam parentem egregiè pius , &
 obsequens , quem ille animum noui modo ad senectutem vs-
 que retinuit ; sed ad memoriam quoque posteritatis exten-
 dit, excitato magnifico in Aede Lateranenfi monumento, vbi
 nomen eius, & tituli, & laudes amplissimis conceptæ verbis,
 & pretioso insculptæ marmori legerentur . Nec verò res erat
 hac tam illustri specie non dignissima, quæque nunc tenacius
 in solidi ædificij lapidibus hæreat, quàm olim in auctoris vi-
 sceribus, & medullis hæssisset . Nihil illi matre dulcius, nihil
 venerabilius fuit, nec sibi magis, suoque ipsius animo, quam
 illi placere, & obsequi enitebatur, fructumque vel maximum
 suorum omnium in virtute, & dignitate processuum, omnis-
 que adeo suæ felicitatis in eo ponebat, quod felicem vnà se-
 cum parentem faceret . Vt rediuiuum cerneret ætas nostra,
 laudatum illud in Martio Coriolano filialis pietatis exem-
 plum, qui cum cœteri rerum à se præclare gestarum vnum,
 propositum haberent gloriæ præmium, in eoque consisterent ;
 ille hanc ipsam gloriam ad redituram ex ea matris lætitiæ,
 porrigebat . Hoc illa tam prolixum erga se filij studium vel
 vna, quam in eo liberaliter instituendo adhibuerat, diligentia
 iure sibi debitum effecit . Cum enim haud satis consideret
 præceptorum, exemplorumque copiæ, quam in Patria eam in
 rem haberet; cœpit consilium plenum dignitatis, & prouiden-
 tiæ migrandi domo, seque cum vniuersa familia in Urbem,
 conferendi ; vt filij à prima ætate Romanis moribus, homini-
 busque assuescere inciperent, inque litteris, & bonis artibus
 inter magni nominis doctores, & condiscipulos adolesce-
 rent, simulque Laurentij Magalotti materni auunculi, illustri
 per ea tempora Gregorij XV. Pontificis Maximi gratia, &
 magnarum rerum administratione florentis, auctoritate, &
 consilijs vterentur .

Excepit aduentum horum in Urbem aucta in immensum
 domus

domus Barberinæ, arcta sibi propinquitate connexæ fortuna, Urbano VIII. post breue tempus ad Summum Pontificatum euecto. Quæ res magno Rasponis vsui fuit tum ad constituendam rem familiarem, tum ad amplificandam dignitatem. Auctus siquidem est ab Urbano Cæsar duobus deinceps sacerdotijs, & honoris amplitudine, & fructuum vbertate in ciuitate præstantibus, altero in æde Laurentiana, cui à Damaso nomen est, altero post hoc dimissum in Basilica Lateranensi. Quibus ille Ecclesijs per omne Pontificatus illius spatium operam suam, industriamque nauauit magna cum diligentia, & pietatis laude, sed præcipuè Lateranensi, cuius præterea memoriæ, ac dignitati egregiè consuluisse visus est, edito luculento de rebus eius commentario. Quo ille opere memoris, & grati erga altricem suam animi, ingenijque elegantia, & eruditione præstantis gloriam doctorum omnium iudicio amplissimam est consecutus.

Secutum est difficile Barberinæ familiæ post obitum Urbani tempus; vt opus illi fuerit ad extrema migrationis ab Vrbe consilia se conferre; in qua expedienda nihil propius factum est, quàm (quia mare ad iter placuerat) vt exortæ fortuitò tempestatis sæuitia pessimè, & propè ad interitum mulctarentur. In huius vniuersi periculi societatem sese coniungere magna cum animi alacritate Cæsar optauerat, inuitusque adeò primo turbarum illarum tempore apud Urbem subsisterat, supra quàm dici potest nauandæ in eam rem operæ cupidus; cum propter eius familiæ pristina de se merita, tum propter recens beneficium amplificatæ suæ non mediocriter dignitatis. Quippe non ita pridem adscitus erat in Collegium duodecim virorum, qui formandis literis Apostolicis præpositi sunt, iusque percipiendi fructus ei muneri attributos acceperat. Ad quorum alterum auctoritate Barberini Cardinalis, ad alterum etiam liberalitate, & facultatibus, est vsus. Nec verò multum intercessit spatij, cum materiam referendæ per hoc genus officij gratiæ nactus est, quo tempore defuncto apud Parisios Tadao Barberino Urbis Præfecto ad solatium relictæ ibi partis liberorum eius in Galliam vna,
cum

cum matre se contulit . Magno autem hæc eius peregrinatio claris illis exulibus adiumento fuit ad gubernandas tali tempestate res suas; cum, super domestica incommoda, in turbas, atque pericula nutantium ciuili motu Galliarum incidissent: magno item illi profectui ad animum pulcherrimarum rerum notitia subornandum, atque instruendum; cum florentissimæ Orbis terrarum nationis, inter tractanda, quibus erat intentus negotia, mores, & studia, & populos sibi penitus cognoscendos suscepisset, seque illi inuicem spectandum, admirandumque præbisset, clarissimasque suas virtutes, & laudes, quarum famæ, secundissimæ mox apud eam gentem de se futuræ, prima iam tum fundamenta iecisse visus est .

Cum autem interposito tandem spatio coorta illa aduersus Barberinos tempestas non mediocriter resedisset, ac tædere cœpisset eius auctorem suæ seueritatis aduersus clarissimam familiam de se, deque Ecclesia, & Republica optimè meritam, iamque de reditu cum illa in gratiam, deque ea gratia affinitatis vinculo stabilienda consilia agitentur, idemque, Cæsar conciliator eius foederis, atque interpres placuisset; nihil fuit in illo splendido munere obeundo eius cōsilio maturius, nihil opera efficacius, nihil fide constantiaq; præstantius: nihil porro, postquam confectum ex sententia negotium est, accidere illi potuit magis honorificum iudicijs de eo factis ab vniuersa Ciuitate . Quæ, quod grauiter, molestèque infestas illas inter summos viros dissensiones tulisset; nullum, finem faciebat gaudendi, & gestiendi, auctoresque suæ lætitiæ plausibus in cœlum, & acclamationibus extollendi . Nemo autem omnium erat, qui Cæsari tanta confecta re omnia, summa deberi non crederet; ac ipsum etiam purpuræ honorem, tradito præsertim Romanis Pontificibus more, locum, quem ipsi antea in amplissimo ordine tenuissent, arbitrio posterorum eius Pontificis, à quo id beneficium acceperant, attribuendi . Nec erat quisquam, qui dubitaret, quin in delectu sic exornandæ personæ habenda esset ratio viri inter propinquos dignatione, auctoritate, & gestis in Ecclesia honoribus facile principis . Cum tamen grauissimis de causis in alia
omnia

omnia tum esset; incredibile dictum est, quàm fortiter, & sapienter sese præteritum tulerit, quàmque magnum ea occasione specimen dederit docilis, tractabilis, & ad nutum rationis ductilis animi. Qua ille moderatione, & facilitate ingenij affectus est, ut planè dignus videretur commodis, & honoribus, quibus mox cumulatè in gratiam nouæ affinitatis est auctus. Quippe à sapientissimo Principe, & summa, in æstimandis moribus hominum sagacitate creditam suæ fidei, accepit partem Reipublicæ multò grauissimam in publico de administratione Ciuitatum Ecclesiæ Romanæ consilio, in quo accipiendis, perscribendisque epistolis, & concipiendis decretis, & dimittendis mandatis, ijsque omnibus cum Principe communicandis præpositus est. Cum autem profligare delicta, & maleficia, comparatasque aduersus ea animaduersiones, & pœnas ordinare, & statuere negotium huius consilij, vel præcipuum sit; dici non potest quantam in ea seueritatis publicæ administratione Cæsar non modò æquitatis, & abstinentiæ, sed etiam lenitatis, & mansuetudinis gloriam sibi parauerit. Qua sanè re difficile omnino factum erat, ut satisfaceret animo Principis, quem omnes nouimus iusti tenacè fuisse, & ab insito aduersus malos, & fontes odio ad vindicandum in peccata, & scelera inductione quadam, naturæ propensum. Quod tamen ille adeò cumulatè perfecit; ut probata semel oculatissimo viro fide, atque integritate, & modestia, quibus ille artibus libertatem loquendi suam condebat; apertè interdum ab illo dissentire auderet, susceptaque ab se reorum causas, tanquam apud iudices, cum eo disceptare. Fiebatque non rarò, ut senex summæ grauitatis, consumatique iudicij in adolescentis sententiam non grauiter concederet, nec vllum ea re suæ constantiæ, aut auctoritatis dispendium se fecisse arbitraretur.

Perrexit in hac eadem curanda prouincia Cæsar, etiam sub Alexandro, qui Pontificatum Innocentij successor exceperat, dilectus in paucis ab illo, atque in pretio habitus; ut nihil maioris quicquam rei in administratione sui principatus haberet, quod illi communicatum esse noller, nihil, in quo consilium

lium eius, auctoritatemque versari non cuperēt.

Sed maximè omnium excellens viri virtus enituit asperri-
mo illo, & pleno terroris pestilentiae tempore. Cui cladi pri-
mo grauitè finibus Campaniae imminenti occurrere, mox
magno impetu ingruentem, perque omnis Urbis partes lon-
gè, latèque diffusam ab vniuersi populi pernicio arcere, ac de-
pellere Parens optimus cum suscepisset; nullo praesentiore,
magisque efficaci ad inceptum tam arduum persequendum
instrumento, quàm hoc ministro suo usus est omni reclinata,
in eius, vt ita dicam, humeros tanti operis mole; propterea,
quod contagionibus morborum occurrere, incolumesque, &
securos ab eo periculi genere populos praestare Cōsiliij publici,
de quo iam diximus, munus est inter alia longè grauissimum.

Quid hìc ego dicam Patres Eminentissimi, aut quomodo
dicam, aut quid omninò non dicam? hæreo prorsus, dubius-
que, & incertus animi sum, quam nam potissimum ex præ-
stantissimis eius laudibus in hoc negotio versatam commemo-
rem, exornandamque, & illustrandam aggrediar (piget
enim initi de nuda narratione propositi) fidem ne, an diligen-
tiam: consilijne vim, an operæ celeritatem, patientiamne in
tollerandis laboribus, an in adeundis periculis fortitudinem?
Cum simul & Urbis saluti, & Prouinciârum tutelæ vnius præ-
cipuè cura, & vigilantia prouidendum esset, versarique assiduè
oporteret in promiscua hominum turba, opem ab eo as-
sistis, & perditis rebus suis orantium. In quibus non pauci
reperi sunt, quos exitiali illo morbo correptos ad collo-
quium suum imprudens cum admisisset; statim inde digressos
miserandum in modum ab eo consumptos audiuit. Sed mihi,
qui omnibus his interfui nihil æquè admirationi fuit, quàm
incredibilis quidam in hoc viro profundæ mentis captus, &
cogitata expediendi felicitas; Vt cum silente foro, intermis-
sisque iudicijs, & omni Ciuitate in vnam corporum salutem,
intenta, reliqua penè omnia, quorum publicè consulto, aut
facto opus erat, illo ministro, atque arbitro transigerentur;
in illa tamen negociorum omnis generis turba, illo curarum
vndique affluentium æstu nullum admodum districti, aut oc-
cupa-

cupati, aut sub tanta rerum mole facilcentis animi signum daret; sed hilarem se, iucundumque amicis præberet, iocisque etiam, & urbanitate in illa tristissimarum rerum tractatione assidue vteretur. Quò factum est, ut Princeps sapientissimus, in cuius laudem, tanquam auctoris, & arbitri consiliorum, hæc omnia redundabant, formidolosa, & plena indignitatis de Vrbe deferenda consilia eo constantius repudiauerit, communemque sibi fortunam cum populi sui fortuna immoto, & de sua statione non decedenti esse voluerit, nec se corruptelis assentatorum, qui talia suadebant, versandum, agitandumque præbuerit, non sine felicissimo successu laboriosi sui aduersus vim pestilentie incepti. Quippe monstrum illud omnium, funestissimum, teterrimumque in Vrbe, & parte Italiae, quam Ecclesie Romanæ amplectitur ditio, luisse propemodum visum est præcladibus aliarum ciuitatum, & gentium, in quas malignitatis suæ virus intulerat.

Speculatam tot arduis in rebus singularem huius viri virtutē exercuere præterea non minore cum eius laude consecuta, æquè difficilia Reipublicæ tempora, cum orta ob rem fortuitam in animo Regij Gallorum Legati offensione, quæ ad ipsius Regis dignitatem pertinere dicebatur, resque iam ad arma spectare cepisset, essetque periculum, ne belli perniciosi incendio omnis conflagraret Italia; restituendæ inter optimum parentem, & carissimum filium gratiæ sequester, & interpres electus est. Hic enim verò theatrum ille idoneum nactus est vnde animus eius, quæ sui parte pulcherrimus esset, & Reipublicæ maximè utilis adspiceretur. Res erat quæ agebatur plena suspitionum, plena inuidiæ: cum homines ignari rerum, & quibus conuulsæ re Christiana opus erat, pulsatum Regium Legatum: ipsum Regem contumelia affectum: validissimam omnium nationem ludibrio habitam, vanissimis sermonibus, rumoribusque differrent: ipse Legatus vir summa dignitate, summaque potentia, inque animo Regis validus, & gratosus in primis, quem propter cuiusquam mortalium auctoritate à suscepto semel proposito deterreri, aut auelli inanis operæ res erat. Hunc tamen Cæsar sollerter odoratus homi-

hominem esse miti, tractabilique natura, & optimæ mentis, optimique-propositi; tum si qua opportunus erat adiretur, facilem, apertum, & rationi maximè peruium. Hunc inquam, adeò sibi deuinxit, tam altè sese in illius studium erga se, & beneuolentiam insinuauit; ut nihil esset tam arduum, quod ab illo non impetraret. Quæ res ne cui dubia esse possit, experimento longè clarissimo compertum est, cuius ego experimenti historiam non minus lepore, quàm grauitate notabilem, propterea quod rei gestæ præsens interfui, breuiter, & summam exponam.

Agebamus in oppido S. Quirici, qui locus primo cum Legato congressui electus fuerat; & durissima quidem prima eius postulata fuere, donec colloquendo, & disceptando, aliaque, atque alia ex ijs, quæ subinde proponebantur paulatim, decerpando non admodum graua visa sunt, præ illis, quæ deinde audire, & admittere necesse fuit. Cum tamen adhuc Romæ grauissimis de causis non probarentur, eoque in summum discrimen adducta res esset, ne abrupta omni reconciliandæ gratiæ actione infestis animis ab ea discederetur; breues à Legato quasi inducias obtinuit, quoad missi eam in rem festini ad Urbem nuntij commodius fortè aliquid afferrent; cumque eam veniam semel, atque iterum accepisset, tertio petere aggressus alienas prorsus ab ea mentione Legati aures offendit; cum certum, fixumque sibi esse diceret nullam ulterius moram interponere, quin infecta pace discederet, violatumque ius gentium iustis, pijsque clarissimi Regis armis repetendum relinqueret, eiusque interim nomine apertas inimicitias propinquis Pontificis, domuique eius vniuersæ denunciaret. Id autem voce, oculis, omnique habitu oris ad tristitiam, seueritatemque composito ita executus est, ut nullum neque, adhortationibus, neque precibus locum reliquissè videretur. Instare nihil osecius Cæsar, & omnes industriæ neruos intendere: nihil reliqui facere, quod ad versandum in omnes partes animum hominis valere posset. Quid multa? expugnat obfirmatum secum luctantis propositum; sed præcipuè validissima omnium amoris adhibita machina, postquam ad urbem-

banitatem, iocosque conuersus, sui quoque, suarq; priuatæ existimationis respectum placidè, renidens, interposuit; ne scilicet obscurus, & inglorius nullo nauatæ tam diligenter operæ fructu ad Urbem, & Pontificem reuerteretur. Namque vir humanissimus non vltrà cunctatus est, quin se animi victum, & in rogantis auctoritate futurum affirmaret; ea tamen, inquit, lege; vt sanctè mihi promittas, hoc te idem vltèrius, etiam si opus maximè tibi videbitur, non petiturum, vtque in hæc verba, syngrapham conficias obligatæ tuæ fidei testem apud me futuram; quod illicò factum est, plaudentibus effusè nobis, qui præsentès eramus, mirificèque fauentibus candido, & liberali summi viri illius ingenio, qui amicitia intra paucos dies coalitæ tantum tribueret; vt sanctissimis eius illecebris imparem constantiam suam esse crederet, quo modo Dictator olim Cæsar imparem aduersus Tullianæ eloquentiæ tela expertus est decretam iam animo sibi aduersus C. Ligarium inclementiam.

Nec verò contentus vir ornatissimus præsentibus hisce, & coram præbitis sui studij, atque amoris indicijs (quasi illum collegam in aliquo magistratu summa cum animorum cōcordia gesto habuisset, ac non potius aduersarium, & summis secum de rebus altercantem, ac dissidentem, & à quo re infecta in omnibus de pace actionibus discessisset) absentem quoque postquàm in Patriam reuersus est amare perrexerit, & colere, & admirari, & exquisitis tollere in cælū laudibus, qua re nomen eius frequens in ore, & auribus florentissimæ illius Nationis, & fauorabile, & gratiosum effecit. Nuper autem cum periculoso morbo implicitum audiuit, in eoque rem esse, vt vitium aquæ intercutis timeretur; tanquam illa curatio sui potissimum officij, & muneris esset, ad agitando pro salute eius consilia, & præsidia expedienda se conuertit, eumque in vsum præsentissima, & miræ raritatis remedia, quanta maxima celeritate fieri potuit, in Urbem transmisit; sera illa quidem, & irrita; quippe biduo demum postquàm suo fato functus iam fuerat, allata sunt. Hoc argumentum felicissimæ in demerendis hominum voluntatibus industriæ, ab homine claro illo quidem, & magno

gno, sed tamen externo profectum, atque ab eo, qui cum illi brevis usus, & creandis potius odijs, quàm amori conciliando idoneus intercessisset: Hoc, inquam, argumentum propter exempli raritatem multò luculentius & vberius ad fidem dicto meo faciendam fore putavi quàm si ad amicorum promiscuæ consuetudinis constanter in hoc genere facta, & acutè dicta me contulisset. Quorum tamen magnam copiam habeo, nec magis numero quàm dignitate præstantem. Tequè imprimis Amplissime Cardinalis Alteri, veterem summi viri sodalem, eidemque societate grauissimorum in Rep: munerum, & mutuis omnis generis officijs intimè, arctissimèquè deuinctum: cum quo propter acceptam vnà Senatoriam dignitatem, eòque proximum vobis attributum in Amplissimo Ordine locum, iucundissimos penè quotidie sermones miscebas: quem præclaris in ipsum, clientesque eius, & necessarios congestis beneficijs, quem honorificis de eius virtute sæpè factis iudicijs amplissimum, & ornatissimum esse voluisti: quem denique cum, supremo hoc morbo laboriosè luctantem, studio, consilij, opera subleuare, & si fieri posset vrgenti fato eripere, conatus es: cuius salutem, ac vitam votis, & precibus à Deo, superisque omnibus pacisci, & flagitare non destitisti, tùm per te ipsum, tùm aduocatis in auxilium tuæ pietatis numerosis religiosorum, Deoque dilectorum hominum agminibus, admotàque efficacissima illa ad cælestem opem accersendam liberalitatis in pauperes machina, nec vlla prætermissa re, quæ ad morandum adhuc superstitis amici spiritum, & honestandam extincti memoriam pertineret. Sed ad institutam mihi inuictæ in hoc viro dexteritatis propositum, à quo longius digressus sum, exequi pergam. Luculentum huius egregiæ virtutis testimonium retulit à Rainaldo Estensi Cardinali, qui sociatis cum Legato rationibus, & consilij in eodem illo Oppido consederat. Cum enim, data occasione, magnificare aggressus esset opes Regias, bellique, quod ab illo instaret, calamitates enumerare, quantoq; in discrimine omnis Italia, Latiumque, & Vrbs ipsa Roma versaretur, cumque à respondente ad ea Cæsare, quædam audisset, quæ ad eleuandas eas tragædias & formidi-

nes pertinerent, idque iocosè, tempestiuè, & multa cum hilaritate dictum esset; en habet (exclamauit) Ecclesia Romana, virum amplitudine sua dignissimum, cuius opera, si me audies, in tractandis Regum, & Principū ingenijs vti non intermitteret; vt qui tā bene calleret artē dissociandi res inter se naturā iunctissimas duas, periculū offensionis, & libertatē loquendi. Ethęc quidem dexteritatis & sapientiæ; illud fidei & probitatis, quod in curandis, quæ acceperat, mandatis, sententiam suam de ijs, quæ agenda erant à sententia Principis discrepantem interponere, argumentisque eam & rationibus prolixè confirmare, per litteras non dubitaret. Vt qui facilè intelligebat hac vnz maximè ratione verum amicum, & fidelem ministrum à ficto adulatore differre. Qua tamen ille loquendi libertate non solum nihil offendit apud Principem, qui suis sensibus & consilijs, propter singulare, quo pollebat, ingenium, exquisitamque doctrinam, meritò delectaretur; sed eo maiore gratia fuit, vt qui paucos ante acceptum purpuræ honorem dies audire ab eo meruerit, breui futurum vt intelligeret, quàm vanum esset, quod vulgò iactatur, malè sibi, rebusque suis eos consulere, qui Principibus contradicunt.

Non placuit irato nostris peccatis celesti numini huic primæ pacis actioni successus prosperos dare, idemque vsu venit secundæ, quæ in Alpibus est habita, ad quam ille profectus est cum splendido Legati Apostolici titulo ex eorum numero, qui missi nominantur; donec tertio tandem experimento in Etruria apud Urbem Pisas negotium omne ex sententia confectum est, ijs quidem conditionibus, quarum austeritatem, mora, & interuallis in immensum auctam sua dexteritate Cæsar, & sapientia magnoperè leniisset. Hoc certè assecutus est, vt longè æquiores acciperentur, quàm quæ ab optimo, & concordia studiosissimo Pontifice, si ita res posceret, accipi iuebantur. Vt cumque autem vniuersa res hæc se habuerit, nemo omniū fuit, cui non abundè persuasum esset de excellentis consilij laude, quam in ea gerenda Cæsar est consecutus, quique dubitare auderet quin illi meritò accidissent, effusæ illæ, quibus rediens exceptus est, populi iuxta, Patrumque gratulationes, & plau-

& plausus. Minimè verò dubitauit Sanctissimus Pontifex, qui debita illi pridem sacræ purpuræ honorem hac potissimum de causa non vltra differendum putauit, adeòq; proximo supplemento Senatus amplissimo illum ordini adlegit, sequente verò, quod post biennium factum est, renuntiavit, & consueti illius honoris insignia ferre iussit. Serius omninò quàm eximij viri promerita, & bonorum omnium studia, & prudentissimi cuiusque iudicia postulabant. Sed ego diuino arbitror consilio iniectam incrementis eius fortunæ moram; vt quæ data forti dumtaxat natalium videri possent, virtuti quoque redita esse constaret, accederetque eius gloriæ, quod nequaquã sine sudore, ac puluere tulisset hanc palmam; adeòque & ipse haberet in amplissimo illo dignitatis gradu, quo magis quàm ipsa dignitate gauderet, & ceteri veris illum, & suis pretijs potius quàm alienis titulis æstimarent, & magni facerent.

Quid iam hîc Patres Eminentissimi oratione cuiusquam opus est, vt qualis, quantusque in tanti honoris fastigio vobiscum vnâ fuerit intelligatis? vos ipsi omnium locupletissimi testes apud vos recordamini, tacitique vestris cogitationibus vobis subijcite, quæ fuerit eius in dicenda sententia grauitas, in exercendis iudicijs religio, in promendis consilijs, ordinandisque sapientia: quàm efficacem eius eloquentiæ vim, vbi consulto opus esset, cognoueritis, quàm grauem in ijs, quæ diuersè antea senseritis auctoritatem: quàm promptam, vicissim, ac paratam in mutando consilio, & sequenda meliore sententia docilitatem: quàm effusè hominis modestia sitis, & morum facilitate delectati, itemque vrbanitate, & salibus, quibus ille seueritatem ingenij sui, & inuicti à vitiorum illecebris animi tristitiam condiebat, quibusq; tanquam machina quadam adhibita, non minus multa in animis audientium, quàm cum seriò loqueretur magnorum oratorum exemplo conficiebat. Sed ego à proposito contrahendæ hoc loco orationis nonnihil discessisse videor, & contra vetus prouerbum noctuas Athenas mittere aggressus. Reprimam itaque vixis cupidè ceptum verborum impetum, & in re minimè obscura testibus non necessarijs vtî desinam.

Re-

• Reliquum est, ut de rebus eius in Vrbinatæ legatione gestis pauca dicam. Ad quam ille Reipublicæ partem nequaquam rudis, & inexercitus, sed capto duodecim per annos regendorum populorum experimento in publico, de quo dixi apud Urbem Consilio accessit, cuius Cōsiliij auctoritate, imperijsque non subiectæ modò Romano Pontifici gentes regnantur, sed etiam ipsarum gentium Rectores, & Præsides; quorum quotidiana in vtramque partem exempla cum prodeant, suo cuiusque auctores honore, aut ignominia consequenter; fieri non potest, ut ij, quos talibus non solum interesse, sed etiam præesse contingit non eximij sint in hoc genere laudis. Atqui nihil minus expediebat viro clarissimo, ad retinendam hætenus partam existimationem, & famam, quàm hæc ipsa, de qua disputo, ratio: propter expectationem, quæ in animis hominum hæc eadem apud se reputantium incredibilis de illo erat commota; quod nihil vulgare, nihil vsitatum, nihil quod ab alio quoquam effici posset humanissimæ illæ gentes eo Rectore sibi, rebusque suis augurerentur. Quod quidem quanti momenti sit ad extenuandum omnem speratæ gloriæ prouentum nemo est, qui non intelligat. Sed vicit, ac deuorauit, ut ita dicam, omnia incommoda, omnesque obices constans, & obfirmatum maximi viri in bona mente propositum, & excellens ad ea, quæ sibi proposuisset efficienda naturæ vis, ingenijque præsentia; quibus factum est, ut quem in prouinciam profecturum magna fama præcesserat, maior, clariorque, & augustior præsens, & datis coram experimentis inuentus sit. Animus recti tenax: vitiorum osor: non minus à gratia, quàm à sordibus inuictus: nulli peruius cupiditati: integritatis, & abstinentiæ in ijs omnibus, quibus partem aliquam sui gerendi muneris credidisset seuerus exactor: apertæ ad omnium querelas aures: nulli ad submouendos ad se adeuntes obices, nulla claustra, nulli lictores; sed præstò semper, & parata ad consulendum notis, ignotisque benignitas: Nec verò ad iam ceptas solum inter ciues controuersias æquitare iudicij finiendas; sed ad excindēda earum, quæ imposterum oriri possent semina intentum, & efficax studium;

ium; vt si fieri posset celebratam illam Horatiano carmine,
ori à litibus orbitatem in suæ ditionis ciuitates induceret,
remerent deinde licet, & rumperentur clamosa caufidicorum
urba; quique alij vermium instar, nisi corruptis discordia mō-
ibus hominum, & voluntatibus ali, sustentarique non pos-
sunt.

Huc pertinet nauata ab illo strenuè, & diligenter opera, ad
extinguenda odia, & simultates, quæ non singulos modò in-
ter se homines, sed gentes, atque familias vniuersim trans-
missis passim, quasi hæreditario iure, inimicitijs collidebant.
Qua in re adèd felix eius industria fuit, tam latè patens, atq;
diffusus laboris in id adhibiti fructus; vt, quæ olim inter sum-
ma rerum humanarum capita præclara in hoc genere, & egre-
gia confecisset, tyrocinium videri possint nobilissimi eius
trouendæ inter mortales gratiæ artificij, quod deinde maiore
animo, ex loco superiore, & addita consilij imperij auctori-
tate, vberius, & maiore cum quæstu publicæ felicitatis exer-
ceret. Hæc autem, multaque præterea, quæ sigillatim com-
memorare superuacuum est, strenuè ab illo facta, & sapienter
consultata cùm in oculis nobilissimæ prouinciæ, & specie ma-
gnifica, & vsu salutaria, & ipsa tractatione iucunda accide-
rent; incredibile dictu est quanta erga illū studia, quales amo-
res in omnium animis excitarent, quamque se fortunatas illæ
ciuitates, ac gentes talem nascæ Principem, ac Parentem ar-
bitrarentur; vt iam maioribus suis felicia illa tempora supe-
rioris ætatis, quibus illi sese præ ceteris omnibus Italiæ po-
pulis gloriosos florentesque iactauerant, inuidere desinerent,
veteresque suos Federicos, & Guidubaldos, clarissima illa ci-
uilibus sapientiæ nomina, minore cum desiderio, memoria, &
sermonibus vsurparent.

Sed mihi, dum temporum seriem nimis religiosè in dicen-
do confector, penè dicere excidit, quod omnium maximè di-
cendum erat, & per omnia ætatis eius tempora peræquè por-
rectum est, eximia, inquam, huius viri in officijs amicitia co-
mendis fides, & diligentia, qua maximè inter principes ciuita-
tis vita eius insignis, & memorabilis fuit. Non ille obiter,

D

& tem-

& temporis causa; sed solidè, & ex animo diligebat, quos, habito delectu, amore suo dignos duxisset; nihil autem hic fuci, nihil ad speciem, ostentationemque compositi: nihil remissi: nihil instrenui: facere occupabat, quod amicos petere ab se æquum esse iudicasset; eoque gratuitum etiam à rubore, qui precibus adiunctus esse solet, munus efficiebat suum; ut qui hoc ipsum commodare, & benefacere in fructu, & pretio operæ suæ poneret, nec præterea quidquam inde ad se redire vellet. Nec verò vnum, aut simplex erat benemerendi genus; cum alijs opera, alijs gratia, alijs consilio præstò esse gauderet, seque cum Principe, cum Patribus, & vbi cumque opus esset, libenter interponere, nullo sui, suarumque rationum respectu, quasi tantundem propriæ spei detrahi videretur, quantum pro alijs impetrasset: Nec minus ad amplificandas amici fortunas, quàm ad propulsandas calamitates industriæ, studijque conferre, quod genus benevolentia, opinione rarius est, & ab usu vulgaris hominum turbæ remotius; quorum plerique omnes non magis solliciti sunt, ne miseros, iacentesque amicos, quàm ne admodum felices, sibi que æquatos adspiciant; pessimà, eademque frequentissimà amoris, inuidiæque, inter maximè coniunctos innasci solita, mixtura. Nullum ille lucrum, nullum commodum in amicis colendis sectabatur; cuiusque rei cum multa alia documenta sunt; tum illud multò clarissimum, quod institutus hæres ex asse admodum pingui à Ioanne Baptista Rinalduccio, viro non mediocris in ciuitate ingenij, doctrinæque fama; contentus præclaro de se facto à vetere amico iudicio, itemque scriptis quibusdam, ab illo elucubratis, reliqua omnia legitimis hæredibus fruenda concessit, quamuis eo tempore, ob sumptus non mediocres ad instruendâ nouâ suâ in amplissimo ordine dignitatem factos, æs alienum grande contraxerit, eamque ob rem tantam molestiam caperet, tamque frequens de ea sermo illius esset, & cum fortuna expostulatio; ut quibus audire talia necesse erat, consuetam hominis alijs in rebus animi magnitudinem requireremus. Quæ tamen omnia perferre, & tolerare satius duxit, quàm committere, ut sanctissimo amicitia fœdere ad
vtili-

utilitatem, & quæstum, quantumvis laudatum, & honorificum, abusus esse videri posset.

Habetis, Eminentissimi Principes egregij Collegæ vestri; qualis à malo pictore delineari potuit; nō tamē adhuc vsquequaque absolutam imaginem. Quippè illam ea parte dumtaxat intuendam vobis proposui, quā publicus eius aspectus, & omnium oculis expositus fuit: cūm Rempublicam tractaret: cūm in Aulæ, cūm in fori luce, cūm in gentium omnium arbitrio versaretur. Qua facie si vobis magnus, & admirabilis visus est; maiorem propemodum, & admirabiliorem visum iri scitote, si virtutem eiusdem in se ipsum intenti, sibi-que vacantis, remque suam priuatam agentis considerabitis.

De moribus hominum rectè philosophari, ciuitatum, & gentium ingenia, & leges, & studia habere perspecta, ceterasque res omnes humanas, quæ extra quemque nostrum sunt intelligentiā, & cognitione complecti, magnæ sine dubio est, sed tamen humanæ sapientiæ. Se verò ipsum nosse, (si quid consentienti in hoc antiquitati vniuersæ credimus) cælestis, & acceptæ Diuinitus doctrinæ res est; ardua scilicet imprimis, & operosa, eademque vtilis ante alias, maximèque frugifera, & salutaris. Hac ego ratione se ipsum regere, sibi-que, & suo animo imperare, quàm si amplissima in alios imperia exerceas multò vtilius, multòque præstantius esse statuo, artemque, & facultatem, quæ hoc ipsum rectè, & cūm ratione facere præcipit, ceterarum artium, facultatumque pulcherrimam esse, & humanæ vitæ ante omnes alias necessariam. Quam tamen artem fateri, quodam cecitatis humanæ, quasi vanam, & ingloriam plerique omnes, summi pariter, infimique contemnimus, & debitas suis quisque temporibus curas assidue ad res alienas, & maximè publicas tractandas extendimus, simul opinionis errore ducti, simul inconsulto quodam proferendi nos vtrūque consilio.

Quod nisi ita quàm sæpissimè heret: sique suarum quisque curarum, & cogitationum satis amplam prouinciā se ipsum, resque suas priuatas esse crederet, ac nemo ad rem capeffendam publicam, nisi sua priuata rectè antea constituta, hoc est,

nisi magnis, & non vulgaribus naturæ, doctrinæq; adiuventis instructus accederet; meliorem profectò loco humanæ res essent, nec tantis immanium incommodorum, & cladum, quasi procellis, & turbinibus agitentur.

Hæc & huiusmodi philosophiæ minimè vulgaris præcepta cum ille penitus animo fixa, & recondita haberet; essetque, ob insitam animi modestiam suarum rerum parcissimus existimator, nec magnoperè aliorum se laudantium, suæque mirantium vocibus commoueretur; nihil sibi cum aula, nihil cum Republica, nihil cum magnis, & modum suum priuatum excedentibus negocijs esse statuerat; contentus modico genere vitæ inter collegas suos Lateranenses sacerdotes non ignauo, neque inerudito in otio, ad mortem usque, degendæ. Mirus animi tranquillitatis amator, quique in ore assidue haberet veteres illos solitudinis cultores, quos sibi, quantum suscepta iam viuendi ratio pateretur, maximè imitandos decreuerat. Mansissetq; in ea ratione per omnem ætatem sequenda, nisi interuenisset auctoritas viri grauissimi, propinqui sui, summa in Ecclesia dignitate, cuius respectu, matrisque præterea, & amicorum adhortationibus, & tantum non conuicio adductus est, ut omissa virtuti animi sui dissentiente philosophia, in collegium duodecim virorum, qui formandis litteris Apostolicis præpositi sunt, ut ante diximus, adscisci se pateretur. Quamuis autem in hoc ille magistratu, propter adiunctum illi magnam tum in foro, tum apud Principem clarescendi facultatem, res gerere, & negocijs implicari, amicorumq; & clientium temporibus inferuire instituisset: quamuis inde per alios, aliosque honorum gradus, per obita munera, per administratas prouincias in media Republica versari non intermitteret, animumque non minus quam corpus varietate, & multitudine occupationum districtum haberet; inibat nihilò secius rationem, qua retineret pristinam illam suam animi tranquillitatem, & studium otij non inglorij, ac solitudinis in ipsa hominum, & negotiorum frequentia usurpandæ; cum exemplo magni Africani sæpè subduceret se multitudi-
ni, & rerum turbis, animumque sapientiæ præceptis, & re-
rum

rum cęlestium meditatione aduersus fortunę vim, & vitiorum illecebras subornaret. Hunc ego pulcherrimum habitum eius animi soleo interdum iucundissima recordatione, mecum ipse recolere, cum æstus omnes curarum, & aulę strepitum, & fori iurgia, quę alij vel obruendo satis essent, non plus illi negotij exhibere animaduertentem, quàm maris, ventorumquę vim magno alicui nanigio, æquali cursu iter susceptum persequenti, & minutos circa se lembos laborantes, & naufragio proximos prætereunti. Testes generosi illi mentis Dei charitate flagrantis excursus, ab illo subinde editi, & scripto consignati. Quę ego scripta cum lego, nequaquam hominem occupatum, & humanis curis distractum, sed veterem quempiam Nitrię, Thebęarumque siluarum incolam, vigilijs, & ieiunijs confectum cogito; eminet siquidem in verbis illorum, atque sententijs imago quędam simplicitatis verę christianę, & animi honestis cogitationibus exercitissimę vnũ Deum intenti, & humana præclare despicientis. Ipsum genus orationis promptum, & profluens, plenum dignitatis, plenum fidei; vt non os loqui, neque digiti scribere, sed pectus ipsum suorum recessuum impatiens foras erumpere, & splendidum sui spectaculum præbere videatur. Quàm augusta specie legentium animis occurrit cum ipse suis laudibus christianę modestię studio apud semetipsum obrectare non dubitat: cum in vitam, moresque suos verbis seuerissimis animaduertit; cum res suas pro Republica gestas ab se penitus abiudicat, ea ad vnum Deum refert auctorem, nec aliud laborum suorum præmium, quàm rectam conscientiam, & Dei gloriam sibi proponit: cum ad rumores purpurę suę constantia, grauitate, & pari in vtramque fortunam consiliorum tenore munum se præbet, superosque omnes votis, precibusque fatigat, ne aut negatus honos dmitteret, aut delatus plus æquo esserret animum suum: cum post adeptam purpuram ad finem vsque vitę, prout quid prosperi, vel aduersi, aut omnino maioris negotij incidisset, mente terrenis abducta curis, in Deum erecta, atque in grates, aut preces effusa consistit.

Huiusmodi frequentes, & penę quotidiani summi viri in

se metipsum receptus, & pleni feruentissimè in Deum charitatis impetus, quos identidem capiebat, non secus, ac exercitatio corporis valetudini facere solet, virtutem eius minimè remitti, hebetarique sinebat; fortemque illum in periculis, constantem in doloribus, inuictum à voluptatibus, omnis humani terroris expertem præstabant, atque vt ductum potius rationis, & seueras christianæ philosophiæ regulas, quàm quò se humanus sensus impelleret in ordinandis suis affectibus sequeretur, efficiebant. Hinc illa, de qua prolixè initio disputatum à nobis est, securitas in obeunda morte, cuius horribili aspectu cùm mentis oculos porrecta per omnem vitam, meditatione durasset, callumque in illis ad solitos eius tormentorum ictus obduci curasset; mirum non est si præsentem, & manus sibi iniicientem non exhorruit, nec eam quasi calamitatem aliquam, aut cladem; sed quasi metam decursi mortalis vitæ stadij, quasi terminum humanarum miseriarum, quasi ianuam æternæ adeundæ gloriæ hilaris, & securus adspexit.

Hinc etiam illa tanto cum plausu ciuitatis excepta rei familiaris post obitum ordinandæ ratio, & nouissima de ijs, quæ in hoc genere fieri vellet prudentiæ, & pietatis plena mandata. Quod genus actionis imaginem animi, testem vitæ, & morum indicem rectè à sapientibus nominari haud scio, an clarioribus vnquàm aliàs documentis perspectum sit. Nihil illi optimo fratre charius, nihil lectissimis adolescentibus fratris filijs iucundius, aut fuit, aut esse potuit, propter eorum suauissimos mores, insignesque virtutes, & concordem secum, plenumque incredibilis erga se obsequij animum, quibus adductus tantum huic generi charitatis indulgebat, vt nullum finem faceret de eorum ornamentis, & commodis amantissimè cogitandi, nihil omninò prætermitteret, quò eos quàm beatissimos, & quàm amplissimos redderet. Vtq; in Patriam suâ sexcentos post annos alter à clarissimo ciue suo Petro Damiani Romanæ purpuræ decus inuexerat, præclare intelligebat inchoatū, cōmuni hominum iudicio, & mutilū relinqui quidquid ad illustrandā eo splendore posteritatē suā effecisset, nisi
opi-

opibus illa, & copijs partæ dignitati conuenientibus instruere-
tur, eumque cumulum cepto iam sibi amplificandæ familiæ
operi ab se deposci, sui que muneris, & beneficij esse debere.
Cui quidem affectui, & spontè naturæ, & tot causarum grauif-
simarum accessione vni omnium flagrantissimo, tamen hone-
statis, & communis boni respectu, & illustris prodèdi exempli
causa imperare hætenus potuisse; vt charissima sibi capita su-
premis testamenti tabulis ab se præterita, & externo hæredi
posthabita discedere sustineret, inusitati cuiusdam animi robo-
ris fuit, & humanarum virium modum propè supergressæ vir-
tatis. Pridem ille singulari sua liberalitate perfecerat, ne
ea parte facultatum suarum, quam à maioribus accepisset,
quisquam alius, quàm eorundem posteritas augetur, neque
hoc ipsum in ea testamenti cera, vbi legata scribuntur, proui-
dere neglexerat. Quæ autem reliqua erant, ne ad Ecclesiam,
vndè essent profecta, ex tradito Canonum Apostolorum præ-
scripto, redirent, à se uero honestatis, & officij cultore caro, &
sanguis (vt vsitato christianæ philosophiæ dicendi genere utar)
impetrare non potuit, nec vilo molliore affectu fixum, & ob-
duratum in recta ratione exactè sequenda pectus perrumpere.
Addidit actioni per se splendidæ claritatem delectus adhi-
bitus in hærede nuncupando; Namque ille ex omnibus Sena-
torij sui muneris partibus ea maximè delectabatur, quæ perti-
net ad summam Religionis tum conseruandæ vbi floreret, tum
vndè excidisset restituendæ, tum quod adhuc non penetrasset,
inducendæ, ac statuendæ. Cum autem mirificè probaret ere-
ctæ nuper sodalitatis apud Urbem institutum de hæreticorum,
ad Ecclesiæ gremium redeuntium fouenda, & adiuuanda con-
stantia, deque prouidendo ne quid ad eam labefactandam, va-
lidissimis telis, inopiæ, egestatique liceret, quod huic neophy-
torum generi interclusus ad patriam reditus, & paternorum
bonorum negatus plerumque fructus est; satis intelligebat si
ad causam tam præclaram opes, facultatesque suas contulisset,
ne moriendo quidem sese grauissimi sui muneris functionem
intermissurum, proferendi scilicet fidei, & religionis imperij,
sed in acie Ecclesiæ militantis in eorum bellatorum numero
futu-

futurum, qui à loco, quem ad pugnandum acceperint ne profusa quidem anima excessisse laudantur. Cui propterea causæ honorificum hæredis nomen, ac titulum concessisse gloriosius multò, & ad famam, dignitatemque vberius, quàm accepisse, legitimis hæredibus fuit; cum ea re non tam patrimonio testatoris exclusos se cernant, quàm admissos, & inuitatos ad eiusdem patrimonium longè opulentissimum dignitatis, & gloriæ, quippe cui augendo opes, & copiæ iure naturæ sibi debitæ adhibitæ sint. Patrimonium, inquam, quod non imber edax, non aquilo impotens possint diruere, aut innumerabilis annorum series, & fuga temporum; ad quod adeò neque erugini, neque tineæ euangelico præcepto cauendis accessus est. Quo propterea nomine vir hic maximus cum tota sua posteritate multò iustius, quàm profanus ille vates magnificas voces illas vsurpare potest. Non omnis moriar, magnaue pars mei vitabit Libitinam. Hinc etiam iterum, ac sæpius illa nunquam satis laudata mortis operendæ securitas, cui sanè nobis clientibus eius, & necessarijs quamquam magna spe ob tanti Patroni iacturam deiectis, non respondere, sensusque, & affectus nostros non accommodare non licuit: neque omninò imperare nobis putuimus nè suppresso dolore tali casui conueniente, pro luctu, & comploratione charorum funeribus debita in plausus inter nos, & gratulationes effunderemur, & actū esse cum illo præclare; nec mortuum talem virum, sed ad famæ immortalitatem, ad æternam nominis gloriam, ad nunquam desitura Cœlestis patriæ gaudia emissum, sine fine prædicaremus.

Quod cum sæpè aliàs fecimus, tum potissimum ipso exequiarum, & iustorum funebrium die, quæ inter solemnia enceniorum, & festam memoriam dedicati sanctissimo Iesu nomini templi, in quo funeratus est, non casus aliquis, aut fortuna coniecit; sed hoc ipsum agens diuina prouidentia, vt non tam funere elatus, & sepulturæ traditus, quàm triumphali faustissimarum ceremoniarum pōmpa, quasi in cœleste capitoliū deductus, & illatus sideribus videretur. Maeste animi virtute vir clarissimè, interque clarissima sæculi nostri decora,
& exem-

& exempla cūm propter vitam strenuè, & innocenter actam, tūm propter mortem piè, & constanter obitam recensende: Fruere istis, ad quæ vnice per omnem vitam adspirasti, Cælestis Patriæ gaudijs, & sanctissima amicitia iura, quorum te cultorem eximium, dum inter nos ageres, experti sumus, in ista æternæ felicitatis, quam obtines, Regia erga tui cupidos, & studiosos tueri, & retinere non intermitte. Quò fiat vt nequaquam intercisum nobis te moriente tuum patrocinium, sed meliorem ad vsum translatum diuinæ gratiæ, per te nobis conciliandæ incremento, assiduâque præsentia intelligamus; dum nos interea dicta, factaque tua, expressamque in ijs vitæ, morumque tuorum imaginem, & quidquid præterea expleta mortalitate reliquum inter nos tui, atque superstes est, gratissima apud animos nostros recordatione, quoad vitam suppeditet, retinebimus.

F I N I S.



It is a very common mistake to suppose that the
only way to get a good result is to use a large
quantity of material. In fact, the best results are
usually obtained by using a small quantity of
material, and by using it in a judicious manner.
The quantity of material used should be determined
by the nature of the work, and by the quality of
the material. It is also important to use the
material in a judicious manner, and to avoid
wasting it. The best results are usually obtained
by using a small quantity of material, and by
using it in a judicious manner.

FINIS

